

欽定大清會典事例

欽定大清會典事例卷六百三十七

兵部

簡閱八旗簡閱軍士 駐防官兵操演

八旗簡閱軍士。○順治年間定八旗驍騎營。每月三旬。逢二逢六較射。凡六次。春秋擐甲胄。步射二次。騎射二次。護軍營每月較射六次。與驍騎營同。春秋二季。驗看騎射。並擐甲胄。馬步射一二次。三年一次考驗甄別。○又定。每年較閱。自七月十六日開操。遇閏七月。即於閏七月十六日開操。至四月十六日停止。自封印日起至開印日暫停。○又定。每年春秋

二季。由部具奏行文八旗。春季於二月十五日起。三月初一日止。秋季於七月十五日起。八月初一日止。各於本旗城上演鳴海螺。仍委司官巡查。○又定八旗大礮鳥槍。由部三年一次奏請運往盧溝橋演放一月。其總理演放之都統。令八旗自行具奏。官軍分三班帶往。屆期由部開列本部堂官職名具奏請。

簡一人前往查閱。○康熙五十年議准。火器營合操陣式。八旗礮鳥槍護軍馬甲。分列為十六營。距將臺百六十丈。正中列鑲黃正黃兩旗。次六旗。

按翼排列隊伍。每營均設帳幕。俟八旗官兵會集。距將臺十丈。按左右翼每邊建令轟一為表。八旗掌海螺人等。分左右立。將臺下每旗鳥槍護軍在前。次礮手。次鳥槍馬甲。各依次序立。將臺上初次鳴螺。兵丁背負小旗。各整備器械。二次鳴螺。若係步下操演。按營結隊。若係馬上操演。各騎馬按營結隊。三次鳴螺。出營向將臺一字排列。頭旗放號槍三聲。臺下海螺出。距令轟十丈。斜接傳令海螺排立。將臺鳴螺。傳令海螺。以次遞鳴。陣內海螺畢鳴。傳令海螺逐一緩撤。

鳴螺止。仍行陣。施放槍礮九次。至第十次。礮與
鳥槍連環施放無間。其坐作進止之節。均與
大閱同。○雍正五年。覆准。驍騎營較射。以每月上旬
逢四八。中下二旬。逢三八為期。該旗都統親往
監視。○又覆准。前鋒營每月較射定期。上旬逢
二六。中下二旬。逢一六。○八年議准。前鋒營較
射。照護軍營例。每年春秋二季。驗看騎射。並攬
甲冑馬步射一二次。三年考驗甄別一次。○乾
隆元年。奏准。八旗漢軍每旗挑藤牌兵一百名。
與火器營一同操演。○三年。奏准。八旗前鋒護

軍等騎射。由部三年一次。於十月內奏請

欽點大臣驗看。開列領侍衛內大臣八旗都統副都統職名。按左右翼繕名進呈。每翼恭候

欽點四五人。會同本翼前鋒統領護軍統領等驗看。務於十月竣事。○又奏准。每年春秋二季。由部傳行八旗合操四次。內春季甲冑操演一次。其兵數及選擇地方操演之處。交與八旗都統前鋒護軍火器營各統領。臨期請

旨。遵照辦理。○四年奏准。每年春季。將本旗各營官兵。合於一處。各於本旗教場操演二次。八旗各

營官兵。於鑲黃正黃二旗教場合操一次。至秋季。仰山窪操演。奏明日期。將八旗各營官兵會於一處。合操二次。其隊伍號令官兵數目。均如大閱之制。○五年

諭。八旗兵丁赴盧溝橋演放槍礮。定例三年一次。於九月內舉行。兵丁人等雖豫領有本月分錢糧。但家中養贍。與在橋日費。不能兼顧。未免拮据。今屆操演之期。朕心軫念。著賞給一月飯銀。以示優恤。再應用帳房。亦著赴工部關領。俾營制齊一。以肅觀瞻。仍交該管官於完操之日。按數繳部。嗣後三年一次赴盧溝

橋操演均照此例行。○六年議准八旗驍騎營每年春秋二季。擐甲步射二次。由旗定期報部。騎射三次。由部定期通行。○七年

諭。近聞八旗於閱兵操演之際。該大臣等皆在帳幕內。互相對閱。並不親赴隊伍操演。則進退之規。不獲嫻熟。嗣後閱兵操演之時。令該大臣等輪流入隊。率領操演。欽此。遵

旨議定。八旗合操時。閱兵王大臣等。逐次前往監看稽察。如有無故不到者。同閱之王大臣指名題叅議處。○十五年

諭。八旗官兵定日較射。係向來定例。凡遇較射之日。不惟參領等官。應行一同射箭。即前往閱箭之管旗大臣。亦應身先射箭。俾官兵等有所矜式。且朕偶遇閱看官兵之日。尚且射箭。而管旗大臣豈可不射乎。嗣後凡遇較射之日。除參領等官務須射箭外。管旗大臣等亦著射箭。儻經朕訓飭後。管旗大臣參領等官。仍有不行射箭者。著查旗御史叅奏。至各部院衙門滿官。雖各有應辦事件。亦當不廢本業。但不必定日較射。各於閒暇操演。○十七年奏准。八旗藤牌兵。入隊排立。在礮位後護礮。○二十二年奏准。八旗

漢軍向例三年一次運礮赴盧溝橋演放一月。三年之內礮手新舊更換未免斷續疏懈。嗣後照滿洲火器營例。每年秋季運礮赴盧溝橋演放十日。奏請

簡派都統副都統二人前往統轄。至烏槍按季操演。皆能練習。毋庸每年同往演放。應於演礮之第三年秋季。槍礮同赴盧溝橋演放十日。仍照例奏請

簡派都統副都統四人前往統轄。兵部堂官於演放之第八九日前往查閱。分別優劣具奏。餘均照

舊例行。○二十三年定。盧溝橋演放礮位。其十日改為五日。嗣後每屆秋季應行驗看之年。兵部堂官於演放之第四五日前往查閱。○又奉旨。嗣後八旗運往盧溝橋演放礮位之時。奏聞。派乾清門侍衛等護持礮車。帶往操演。朕如行幸時。著在京總理事務王大臣等奏聞。派大門上侍衛每旗一員。○二十四年奉

旨。八旗漢軍槍礮藤牌。嗣後停止春季操演。著令秋季操演。○又奏准八旗兵丁步射之期。每日午時往教場演習。令該旗大臣閱看。嫻熟者分別獎賞。平

常者即行重責。該旗大臣不親身前往閱操。查旗御史即行叅奏。○又奏准。八旗各營官兵。每年秋季各在本旗教場操演二次。再將八旗官兵分為兩班。每日派出四旗。於兩黃旗教場各合演一日。○又奏准。聚集之期。及射期不到者。罰俸一月。若官員監射步靶多開箭數者。罰俸一年。○又奏准。八旗漢軍。每年秋季赴盧溝橋演礮。應派大臣。由鑲黃旗漢軍都統會同各旗漢軍都統開列職名。奏請

欽點都統副都統各一員。並請

欽派御前侍衛乾清門侍衛八員。管轄礮車。如遇
聖駕巡幸之時。留京辦事王大臣奏派門上侍衛八
員。每旗仍各派管理礮營參領一員。章京驍騎
校各五員。監管火藥官二員。每佐領下領催一
名。兵五名。每旗礮手四十名。除該班外。俱行前
往。○又奏准。八旗滿洲火器營。每年秋季操演
槍礮。俟八旗漢軍演礮完竣後。奏請帶往盧溝
橋演放。派出礮營參領八旗章京四十員。驍騎
校四十員。印房筆帖式二員。領催一百六十名。
甲兵七百二十名。將滿洲火器營大臣繕寫緣

頭牌奏請

欽點一員前往驗看。○二十六年

諭。包衣三旗護軍亦著交與派出軍政王大臣等一體

考驗。○二十九年奏准滿洲火器營兵丁每月由該

管官帶領各赴本旗教場步射六日。騎射六日。

馬上三槍六日。餘日除該班差務外著演習清

語諸技。該管大臣仍不時按旗查閱。○三十一

年奏准火器營護軍照三年一次考驗八旗前

鋒護軍之例一併考驗。○三十三年奏准驗看

八旗前鋒護軍等騎射。三年一次於四月內奏

請。○三十六年奏准。八旗官兵添演衝陣馬。若
在兩黃旗教場。分為二班操演。其地窄小。於衝
陣時難以跑馬。嗣後定為一日。仍在仰山窪操
演。○三十九年奏准。每年赴盧溝橋應出演神
威無敵礮位之旗分。仍出演礮十位。其餘七旗
各在應演礮位內。輪流出演九位。○又覆准。嗣
後屆應查礮之年。演礮十位之旗分。以中二十
七出以上為合式。演礮九位之旗分。以中二十
五出以上為合式。其中牌在二十六出二十四
出以下者。將該旗礮營參領等官罰俸一年。礮

手嚴加責懲。○四十年

諭八旗操演兵丁日期均係每月三八同日。射箭大臣等必不能均到。自應改定。嗣後左翼射箭著仍按三八日期。右翼射箭著改為二七日期。○四十二年

諭京城兵丁三年舉行軍政一次。列為頭等者賞給銀兩。其平常生疏者革退。此特為分別兵丁優劣起見。但健銳營外火器營圓明園兵丁並不入於軍政。嗣後健銳營外火器營圓明園兵丁與京城兵丁一體交與派出軍政王大臣等考驗辦理。○又覆准演放千斤以上礮位。設立三百步礮靶。放十五出。中

十出以上為合式。五百斤以上者設立二百步
礮。靶放十五出。中十二出以上為合式。四百斤
者設立一百步礮。靶放十五出。中十三出以上
為合式。如較定數少者。將管礮官照例議處。
四十五年奏准。八旗演礮。除一百步礮位不算
外。二三百步礮位中數若能符額。礮營參領紀
錄一次。礮手每名賞銀一兩。若中不及額。欠少
一二出。礮營參領記過一次。並將年終參領分
內應得紀錄不行。給予礮手責四十棍。欠少三
出以上。將該旗礮營參領罰俸一年。仍停升一

年。礮手責八十棍。○又奏准。嗣後盧溝橋演礮。停止礮車。於三四日前出派礮手。豫往操演處所。固築土牛。以備操演。○四十八年奏准。八旗漢軍。並正陽等十六門礮位鳥槍。遇兵部查看。演放之年。如恭逢

聖駕前往

盛京。謁

陵。即改至下年按期演放。○四十九年奏准。正陽等內外十六門。存儲礮位。隨同八旗運往盧溝橋。分為四門一次。輪流演放。以安定門東便門德勝

門西便門為一次。東直門廣渠門西直門廣甯門為一次。朝陽門左安門阜成門右安門為一次。崇文門永定門正陽門宣武門為一次。每閱三年。每門出演十位。共計四十位。並將神機神樞等礮。每次共撥出二十二位。一併演放。該步軍統領於八旗步營及巡捕營官兵內酌派前往。如法演習。以資熟練。○又奏准八旗護軍營。每年將左右兩翼護軍統領等職名繕寫綠頭牌進呈。每翼

欽派護軍統領二員專司交衝其左右兩翼交衝官

兵。八旗先揀派年壯兵丁善跑馬者。交直年護軍統領等留心指示。如至合操時。有不整齊及遲誤者。將兵丁責處。該管護軍統領章京等交部察議。至八旗各營前往合操。大臣到時。先至將臺。往見大閱長。照行圍管頭轟大臣之例。公同畫圈。後再上隊。帶領官兵操演。兵丁內如有放礮遲誤。鳥槍走火。進退違式者。該管大臣章京等隨時記名。俟演畢。帶至將臺責懲示衆。

五十年

諭。此次考驗八旗前鋒護軍等騎射等第。將前二次數

目較對頭二等漸次加增。顯係派出之王大臣瞻徇情面。草率驗看。欲圖市好。三年一次派出王大臣等考驗八旗各營兵丁。原為伊等騎射。逐一覈實考驗。理應按其優劣。據實具奏。若皆似此塞責。不足以示勸懲。著將此次派出之王大臣申飭。嗣後再遇軍政之年。仍如此市好。草率了事。朕必將伊等交部從重議處。斷不寬宥。○五十一年

諭。八旗漢軍鳥槍披甲。每年操演。僅止該大臣閱操。恐未能訓練精熟。嗣後著交管理火器營大臣等。自八月起至十二月止。每逢八旗漢軍馬甲等操演鳥槍。

之期。火器營大臣等。輪派前往操演處所。會同該旗大臣留心訓練。○五十二年

諭。此次八旗漢軍演放火礮。鑲黃正白二旗。不能如數

合式。皆由該旗大臣等平日並未認真嚴加督率所致。僅將官兵治罪。不足示儆。所有官員著交部議處。著為令。○五十五年奏准。盧溝橋演放礮位。八旗每年出派千斤以上礮二位。五百斤以上礮二位。四百斤以上礮五位。又八旗輪派二千斤以上礮一位。共計七十三位。定以三年演放一次。兵部屆期行令每旗酌撥一二位前往演放。其餘

每年應演之礮。仍照現在出演數目。每旗於四五百斤礮內。派撥九位前往演放。○又奏准。礮位毋論大小重輕。均各於一百步設立礮靶。演習。其多中一出者。礮營參領紀錄一次。多中二出者。紀錄二次。若中數僅能合式。毋庸給予紀錄。其礮手兵丁。如能多中一出者。賞銀一兩。二出者。賞銀二兩。○五十六年奉

旨。每年八旗官兵合於一處操演。為數甚多。若止合操一二次。則整齊與否。一時殊難看出。嗣後大操前期。先將八旗官兵按旗演閱。再行會集一處合操。○五

十九年奏准。每年秋季演放礮位。向例於九月初一日至初五日演放。其應派兵部堂官驗看之年。適遇武會試於九月初五日開考外場。兵部堂官分圍監試。難以分身。改於九月二十一日至二十五日演放。如不值會試。仍於九月初一日至初五日舉行。○又奏准。八旗漢軍演放礮位。每礮演放十五出。中十三出為合式。○嘉慶四年奏准。神機神樞等礮。及改鑄得勝大礮。並現存礮內。揀選共成二百四十位之數。分於各門存儲。每年輪演六十位。隨同礮營前往學。

習演放以期熟練。○又

諭我朝

太祖以來滿洲兵丁止以馬步射為尚。並未有別項器械。後雖設立火器健銳等營。演習鳥槍。而護軍營仍照舊演習馬步射。今護軍統領奏令護軍演習鳥槍。誠越職言事。將此通諭前鋒統領護軍統領等。自今以始。各於其所轄兵丁分內之技藝。務期演習至善。不可擅改舊例。○六年

諭此項神機神樞礮一千七百二十九位。嗣後毋庸隨同礮營演放。著專歸步軍統領衙門經營。每年春季

輪用二百位。施放火藥。出鑄一次。秋季即將春閒出
鑄之礮。仍運往盧溝橋安放。單九。燃放一次。屆期該
衙門奏請於提督及左右翼總兵內。揀派一員。會同
派出。燃放八旗礮位之大臣。公同監視燃放。至各城
門所存之渾銅紅衣得勝等礮。著歸入八旗礮營。每
年一體輪流燃放。毋庸步軍統領衙門經管。以專責
成。○又奏准。各門所存之神機神樞礮位。每季仍分
四門燃放一次。派參遊都司五員。專司此項礮
位。每年燃放時。仍同四門千總各門礮手。並帶
五營鳥槍兵。如法燃放。俱以五日為期。定以每

十出中六出為合式。其有多中少中數目之處。俱查照八旗礮營之例辦理。○又奏准八旗滿洲火器營。盧溝橋演放礮位。派出翼長二員。管礮營參領八員。印務筆帖式一員。藍翎長二十名。隊長二十名。甲兵四百四十名前往。○又奏准八旗習射官兵。如有無故不到至三次者。係官罰俸一年。兵丁責革。若該管大臣有徇庇官兵者。降三級調用。○又奏准八旗官兵習射之期。該管大臣有不行親往演射者。罰俸一月。○又奏准每年秋季八旗合操時。各該旗營大臣

等親身入隊帶領操演總理操演王大臣前往查閱各該旗營大臣官員內如有託故不到者即行查叅罰俸一年。○又

諭從前每年閱兵八旗都統前鋒統領護軍統領副都

統等止在閱兵處呈遞職名並不與大閱長見面嗣因止遞職名未親身前往被大閱長查出叅奏後遂於每閱兵時令各旗都統前鋒統領護軍統領副都統等務須親身至彼處與大閱長見面但大閱長內並非均係親王郡王都統內有兼大閱長者而親王郡王內亦有兼管都統事務者每年閱兵若令衆親

王郡王各自前往面見大閱長。與禮儀不甚相合。嗣後閱兵時。都統前鋒統領護軍統領副都統等親身至閱兵處。仍照舊例呈遞職名。毋庸面見大閱長。如此更定後。此內如有止遞職名而不親身前往者。被大閱長查出。即行指名參奏。斷不可徇情代為迴護。

○又奏准。火器等營。經該管大臣操演槍礮。如有施放遲誤。不能整齊者。將帶操章京罰俸一年。監操翼長罰俸六月。○又奏准。八旗火器鳥槍等營。演放鳥槍。務須嚴禁閒人。不得近靶。揀拾鉛子。如帶操官員不行管束。任聽閒雜人等。

近靶行走。以致兵丁放槍誤傷平人者。將帶操官員罰俸一年。○又奏准。常年運礮赴盧溝橋演放。演畢後。監放大臣將演過之礮。按位黏封。交該礮營另行存記。俟次年演礮時。監放大臣會同

欽派侍衛等。詳細查明。將未演之礮。輪換出演。不得以演過礮位充數。○又定。嗣後各營兵丁。停止行演步圍。○又奏准。八旗前鋒護軍等營兵丁馬步箭。如有技藝生疏者。將該管大臣降一級留任。該管官降二級留任。○七年覆准。神機神

樞礮位。嗣後每年春季毋庸出銑。於秋季演礮之期。每四門共出礮一百位。運赴盧溝橋。隨同八旗礮位。用碎丸演放。毋庸計算成數。○八年奏准。八旗各營兵丁馬步騎射。每屆三年考驗一次。向於四月內奏請辦理。嗣後改於二月內具奏。三月初間即行考驗。○道光三年奏定。八旗兵丁操槍所放鉛子。該旗派出官兵拾取。如派出拾取人等。不實力奉行。或私買添補者。將失察之該管官罰俸一年。○又奏定。八旗漢軍。每年秋季將應出礮位奏請帶往盧溝橋演放。

如未屆應演年分。礮位誤行運出演放者。將兵丁照不應重律杖八十。照例鞭責礮營參領降一級留任。都統副都統各罰俸六月。○又奏定。八旗官兵演習步射之期。該管大臣親往稽察較射。前鋒統領護軍統領內。遇有進班事故。令隨同辦事參領較射。其習射官兵等。除出差進班及實有事故之人外。有不到者。係職官申飭記過。係兵丁鞭二十七。至三次者。係職官罰俸一年。兵丁責革。○又奏定。八旗護軍營兵丁。於合操時。有不整齊以致遲誤者。將兵丁責處。該

管章京等降一級留任。護軍統領罰俸一年。○
又奏定八旗前鋒護軍

上三旗包衣護軍。火器營護軍。健銳營外火器營
圓明園兵丁等馬步箭。兵部三年一次於二月內
奏請

欽點大臣驗看。如有騎射生疏者。據實叅奏。交部將
該管大臣降一級留任。該管官員降二級留任。
○五年奏定官兵習射之期。該都統副都統親
往演習射法。各該旗豫將較射大臣官員職名
及習射兵丁花名造冊。送查旗御史查覈。是日

該御史仍親往稽察。如該管大臣有不親往演射者。即行叅奏。罰俸一月。○又奏定。八旗官兵。每年春秋二季。撥甲習射。步箭二次。各旗擬定日期。咨明兵部稽察。另由兵部定期。傳行習射。馬箭三次。如有年過六十歲者。免其騎射。○又奏定。八旗漢軍槍營。礮營。內外火器營。左右兩翼前鋒營。健銳營。步軍營。巡捕五營。

圓明園八旗包衣三旗護軍營。內務府三旗護軍營。新槍營。陳槍營等處。各按操演藥鉛數目。豫備軍需火藥鉛丸一分。於各該旗營公所存儲。

嚴派官兵專管。豫為包封妥固。以備需用時按名散給。此項火藥每屆十年出陳易新。作為尋常操演火藥應用。仍豫領一分存儲。其尋常操演藥鉛。仍照舊支領。○又奏定在京各旗營操演槍礮。應需火藥轟藥鉛丸鐵子火繩等項。每屆操演之期。先將應行操演鳥槍兵丁花名。以及礮位數目。造冊送部。兵部按例覈明。知照工部。覈給火藥等項。令其操演。儻冊報後額設兵丁遇有出差告假等事。及額設鳥槍出差帶往者。即行咨報兵部。將所餘火藥等項。留為下屆

操演應用。於下屆支領冊內。聲明扣抵。毋得遺漏多領。○又奏定。正陽崇文宣武朝陽阜成東直西直安定德勝等九門。每門額設鳥槍二十杆。共一百八十杆。分爲春秋二季操演。每季各演九次。每次各演十出。每出用火藥二錢。轟藥二釐。火繩一寸。由工部支領。○又奏定。八旗漢軍藤牌兵。每旗一百名。每旗於參領副參領內。選派一員。章京驍騎校各二員。領催各五名。管轄藤牌兵。每年春秋二季。四旗合操四次。八旗合操二次。漢軍都統副都統閱看操演。○又奏

定。八旗海螺。由兵部行文。春季於二月十五日
演吹起。三月初一日止。秋季於七月十五日演
吹起。八月初一日止。兵部派員稽察。

駐防官兵操演。○順治年間定。各省駐防官兵
較閱騎射。春秋合操。均與京城同。○又定。各省
八旗水師營。每年春秋二季。將軍都統副都統
等。督率官兵分駕戰艦操演。金州。福建。乍浦。廣
東。出海口。操演。黑龍江。齊齊哈爾。墨爾根。江甯
出江。操演。天津水師營。乾隆三十
二年歲每年四月起
八月止。出海操演。均擇天氣晴和。潮平風順時。

官兵乘戰艦出洋列陣。張帆起碇。掌號發礮。以次操演。停操之後。各督率官兵講習水務。○乾

隆十八年

諭。騎射國語。乃滿洲之根本。旗人之要務。朕今歲較閱京城世爵。其騎射可觀。及人材英俊者。已施恩選取侍衛。並分在各處。令其學習行走。其射箭甚劣。不堪教化者。查明革職。別行承襲。至各省駐防。亦皆有世爵。若不教訓騎射國語。伊等近於素餐安逸之習。必致學為不善。著各省將軍都統等。將伊等不時教導。務使騎射優嫻。國語純熟。如有教訓不悛。騎射甚劣。

者。該將軍都統等即指名叅奏革職。另行承襲。○四

十六年

諭盛京吉林黑龍江將軍副都統兼辦地方事務。各省將軍副都統除管轄操演外。並無另有應辦事件。每月但操兵六次。尚有二十餘日安逸。乃俱不親身閱看。但派令章京等閱操。而章京等又倚靠屬員閱操。該將軍副都統又不詳查。兵丁漸生疏懈。自必廢棄技藝。豈非徒有武備之名乎。嗣後各省將軍副都統俱著親身前往閱操。若有希圖安逸不親身閱操。派令章京等閱操者。朕必從重治罪。將此通行曉諭各

省將軍副都統城守尉遵行。至盛京吉林黑龍江將軍副都統辦事之暇。仍著親身前往操演。○四十八年議准。各省駐防兵丁。鳥槍弓箭中靶數目。照綠營奏定之例。分別等第功過。彙造清冊。送部察覈。內有應行責革者。即由該管官隨時責革。應行獎賞者。亦由該管官量加獎賞。儻該管官員。不能留心操演。以致兵丁技藝生疏者。仍即行叅處。並於年終將官兵步射鳥槍等第。及放礮陣式。據實具奏。○又奏准。各省駐防兵丁。仍令各按該處情形。隨時操演。不必照綠營之例。

分別考覈。○嘉慶元年

諭健銳營向設有雲梯一項。專挑兵丁習演。最為趨捷。嗣後外省有駐防滿兵處所。該將軍等亦當仿法挑選數百名。演習雲梯。俾臻精熟。不可有名無實。○四年奏准。

盛京所屬水師兵丁。兼習陸路技藝。該將軍等督率該管官員實力訓練。務使技藝精熟。以收實效。○又奏准。

盛京所屬水師額設戰船十隻。舵工水手一百名。派撥兵丁六百名。演習水操。往來巡緝於旅順。

口外黃金山地勢緊要之處。安設墩臺。多派官兵防守。與戰船水師聲勢聯絡。其戰船十隻。以二隻守口。其餘船隻。在於柳樹屯地方操練。

十七年

諭。本年閱看黑龍江官兵射布靶十八人。內中四箭者止一人。中三箭者五人。並無射中五箭東三省官兵等。素稱善射。該將軍等派令隨圍。自係選擇純熟。乃此次黑龍江學習隨圍人等。射中布靶甚少。此皆該將軍平日並未認真訓練。前因斌靜叩謝天恩。繕寫漢字。當傳旨申飭。今閱該省官兵射箭平常。可見斌

靜平日於訓練之時。並不留心。斌靜著再行申飭。嗣後該將軍等務須將該管官兵實心教導。毋得怠惰。

○道光八年

諭。上年回疆滋事。徵調各處官兵。據長齡楊遇春等奏稱。烏魯木齊駐防官兵最形輟弱。昨那彥成奏回疆增設防兵摺內亦稱該處馬隊弓馬平常。技藝生疏。難期得力。總由該都統領隊大臣等平日因循廢弛。昧良耽逸。不肯隨時整頓所致。本應嚴加懲治。念其事屬已往。非止一人一任。姑免查究。嗣後該都統務當督率領隊。實心實力。訓練操防。必期一兵有一兵。

之用。如仍毫無起色。恐該都統等不能當此重咎也。

○十一年

諭朕恭閱

聖祖仁皇帝實錄。內載康熙二十五年七月

諭旨。駐防兵丁關係緊要。歲月既久。恐致疏懈。必選嫻於騎射。膂力驍勇者。方准披甲。現在兵丁內有庸弱不嫻騎射之人。應革退另補。不得虛充數目。著嚴飭該管之將軍等知之。

聖諭煌煌。意至深切。當時已慮及駐防兵丁歷久疏懈。閱今百有餘年。承平日久。恐該兵丁等於騎射操演。

漸涉因循廢弛。殊失分防駐守講求武備之道。夫兵可百年不用。不可一日無備。所有此項駐防兵丁。該將軍副都統等。務當督飭所屬。隨時認真訓練。如有技藝生疏者。必應革退另補。並揀選年力精壯。嫻習騎射。膂力驍勇者。方准披甲。毋得以老弱充數。以期一兵得一兵之用。將來儻有徵調。未能得力。惟該將軍副都統等是問。毋謂誥誡之不早也。○二十一年諭。耆英等奏兵丁等操演鳥槍。請示鼓勵一摺。盛京前鋒兵丁等。自上年秋令以來。演習鳥槍。均臻嫻熟。著照所請。嗣後准其於每旗前鋒內。擇其槍箭出衆者。

揀選二名。作為委前鋒校。賞其金頂藍翎。又盛京滿洲蒙古漢軍領催馬甲。現於兩季常操外。均各加添演。並學習鳥槍。著准其於每旗再添金頂委官二名。仍食原餉。以示鼓勵。而期振作。

欽定大清會典事例卷六百三十八

兵部

簡閱

綠營簡閱營伍一

綠營簡閱營伍。○順治十一年題准。營兵每年給予操賞銀。定期演習騎射。優者該督撫提鎮酌量獎賞。○又題准。武職官並不操演。或傲慢怠惰。託病規避。擅離汛地。以致廢弛營伍者。革職兼轄統轄官不叅劾者。照不揭報劣員例分別議處。○又議准。營汛官弁操演巡防。各有職守。若該管上司擅行差遣者。罰俸一年。被差遣

之官免議。至城守官弁因公出境。將城守事務交與不應管之人者。罰俸一年。如上司將城守官弁盡行傳去。以致巡防虛空者。罰俸一年。○康熙五十二年。

欽命大臣分往各直省賞賚營兵。仍會同該督撫提鎮操演騎射。以數軍實。○雍正六年。覆准衛所不領運備弁。該督撫於春秋二季調考。照營員例賞罰。○九年。覆准衛所守備千總與營員不同。營員專管營汛。不理民事。衛所即停運之年。亦有催兌催開。並專理新造修脩船隻等事。若春

秋兩季調考。必先令藩司糧道較驗後。再赴督臣考覈。一年之間。往返道途。不勝其煩。嗣後每年俱俟重運已經開行。尚未回空之時。就近撫臣調考一次。○十一年

諭。各省營伍。必須武職大員。平日親行巡察。庶可以除怠惰。廢弛之弊。提督一官。節制全省。統轄之地甚廣。難以親身徧歷。至於總兵官分轄地方。道里不甚遼闊。巡察尚易周徧。嗣後各鎮臣有應行巡察者。著先期奏聞請旨。候朕批示遵行。不必拘定限期。免各營豫備供應。致滋擾累。儻有苛累所屬弁兵者。經朕察

出。定行從重議處。○又議准各省總兵官巡察所屬營汛於親標兵內跟隨一二十名。自帶帳房羅鍋。下營駐紮。若絲毫苛累弁兵。及收受各營供應。並擅役民夫。照因公科斂例議處。該督提不能察出。照不揭報劣員例議處。如跟隨兵丁騷擾地方。不能覺察者。照失察營兵生事擾民例議處。其各營汛騎射是否優嫺。軍裝器械是否整齊。具結詳送該督提覈明報部。若有不實者。照察報不實例議處。○十三年覆准衛所守備千總俱令與附近營汛員弁按月操演。仍於每

歲冬季督撫調考一次。○乾隆元年奉

旨。各省營伍離提鎮遠。不能親身稽察。該督撫酌量地方營制。如何令提鎮等隔數年一次親身查閱。詳議具奏。欽此。遵

旨議定。直隸提督營汛分為三路。每年閱一路。馬蘭宣化。正定。三鎮營汛。每年各閱一次。泰甯。天津。二鎮營汛。二年各閱一次。山東省兗州鎮營汛。每年於催漕事竣。閱臨清等處。其沂州等處。委官往閱。二年通閱一次。登州鎮營汛。一年閱。東南各處。其西南各處。委官往閱。一年閱。西南各處。

其東南各處委官往閱二年通閱一次山西省

太原大同二鎮營汛每年各閱一次河南省南

陽河北二鎮營汛每年各閱一次江南省蘇松

鎮所屬營汛係駐紮同城毋庸查閱提督今安徽巡撫兼上一年閱一次狼山壽春二鎮今增設徐州鎮淮揚

江提督山鎮營汛每年各閱一次江西省南昌今改九江

鎮二鎮營汛每年各閱一半以二年而徧福建

總督今改閩浙總督到任後閱一次水師提督今裁一

年閱海壇閩安烽火門等處一年閱金門南澳

銅山等處以二年而徧陸路提督一年閱興化

福州。福甯。建甯。延平等處。一年閱泉州。漳州。龍
巖。汀州。邵武。永春等處。以二年而徧海壇。金門。
南澳。臺灣。四鎮水師營汛。每年閱一次。福甯。汀
州。建甯。漳州。四鎮陸路營汛。每年閱一次。浙江
提督。每三年閱一次。定海。黃巖。溫州。三鎮營汛。
每年閱一次。衢州。處州。二鎮營汛。每年閱二次。
湖廣總督。到任後閱一次。提督。今改湖北。湖南。兩提督。每
年巡閱一次。湖北。湖南。以三年而徧襄陽。今改鄖陽。
宜昌。永州。鎮筸。四鎮營汛。每年各閱一次。陝西
總督。今改陝甘總督。五年閱一次。提督。三年閱一次。延

興漢

陝今改

河州涼州甯夏西甯肅州七鎮

增今

設甯

營汛每年各閱一次四川省川北重慶建

昌松潘四鎮營汛每三年各閱一次廣東省左

翼右翼高州瓊州碣石潮州南澳七鎮營汛每

年各閱一次廣西提督三年閱一次左江右江

二鎮營汛每年各閱一次雲南貴州二省提鎮

所屬營汛酌量數年內閱一次各將出巡回任

日期及各營汛官兵技藝是否純熟軍裝器械

是否齊全具本題報○又議准各省營汛屬總

兵官所轄者該總兵官親身查閱專屬提督所

轄者。該提督親身查閱。至於提鎮駐紮寫遠。不能親身往閱者。委附近之副參遊等官查閱。詳報。如有苛累及閱報不實。一例議處。○六年

諭。武備所關緊要。外省營伍整飭者少。廢弛者多。嗣後各督撫提鎮等。當盡職守。以勵戎行。如一二年後。朕命公正大臣前往驗其優劣。其騎射果否嫻熟。軍容果否改觀。皆顯而易見。難於掩藏者。儻仍前廢弛。朕必將該管大臣嚴加處分。○九年奏。凡奏請

欽差大臣前往近省查閱營伍。其邊遠省分。或即於駐防將軍副都統內

命往查閱。如有將弁貪縱不法。兵丁缺額不補。技藝生疏。器械朽鈍者。即據實奏奉。

旨。直隸山東武備尚屬整飭。先命大臣由河南一路稽察上下江一帶。餘省候旨。○又奏准凡

欽差大臣查閱營伍。其器械之堅脆。技勇之生熟。人數之虛實。糧馬之虧盈。自難掩蓋。惟是旗帳甲冑弓刀馬匹等項。修整買補。勢所不免。不肖官弁。或乘此藉端科斂。或坐扣營兵月糧。皆未可定。應飭各督撫提鎮等嚴行稽察。如有前項情弊。立即叅劾。儻容隱徇庇。一併嚴加議處。○又

諭。國家承平日久。各省營伍日就廢弛。朕早已知之。今

各處情形。大概甲仗旗幟尚屬鮮明。而烏槍騎射各種技藝。則皆屬平常。該管大員平日所司何事。而輕視武備若此乎。該將軍督撫提鎮等。各宜痛改舊習。勤加訓練。俾士皆精銳。戎行改觀。務期平時可資捍衛。有事可以折衝禦侮。孔子曰。不戒視成。謂之暴。今朕與以三年之限。著兵部請旨。達省地方。亦必差官查閱。其就近省分已經閱過者。有無整頓。亦必再行考驗。該管大員等皆朕信任之人。於職分所在。未能辦理。以致營伍廢弛。負朕委任之意。豈不可愧。此次

諭

命往查閱及將來所遣之人。皆朕親信簡用者。自必據實陳奏。斷不肯代為容隱。儻此番訓諭之後。尚不自勉。仍復因循怠忽。視為具文。或經朕訪聞。或被欽差察出。則曠職之咎。不能為該大員等寬也。○十年。國家設立營伍。修明武備。以為折衝禦侮之用。必訓練精熟於平日。斯可奮勇決勝於臨時。是以陸路設營汛。沿海設水師。皆須勤演習。收實效者。自去年朕命大臣查閱營伍後。陸路該管大員。頗有竭力整頓氣象。而水師操演。則不過將演就陣法塞責了事。其操舟破浪之法。官弁兵丁。茫然不知。以為此水手之

事漫不留意。即至舵工水手。其能熟練者。亦屬寥寥。平日操演之時。各船進退。尚且參差往來。間斷。苟其臨敵。何以致用。夫水師以舟為主。出沒風濤。去來倏忽。必掌舵者能操縱自如。而搶風折艤。破浪衝波。水手等盡能嫺習。即官兵兵丁等。亦皆心領神會。不待呼應而自靈。然後猝然遇敵。駕駛輕捷。一舟之中。臂指相使。如一人之身。則應變制勝。無難。向來水師官弁。仍以水師用。原欲其熟悉情形。收得人之效。今則視為故套。該管者不加察。傲幸者苟延玩。是育材之善政。為容身之捷徑矣。著通行申飭沿海將軍督撫。

都統提鎮等。務遵朕旨。實心訓練。實心甄別。毋得仍前玩忽。虛應故事。○十一年

諭。從前因各標營日漸廢弛。朕命大臣前往山東河南江南等省先行閱看。並降旨申飭。復於督撫提鎮奏摺中時加批諭。令其實力整頓。今各省操演之法。大抵旗纛戈甲。期以飾觀。步伐陣圖。似為練習。其實在技勇精強。弓馬嫻熟者甚少。在水師營汛。亦不過演就水陣。聊以塞責而已。即軍政薦舉。未能盡屬公當。徒為具文。以是整飭戎行。豈能使壁壘一新。士氣日奮。即如西北稱勁旅。而江浙多柔脆。不知既已為兵。

自應鼓其銳氣。使弱者日近於強。豈可任其委靡。不加振作。蓋營伍之中。兵馬錢糧甲冑器械。皆宜事事留心。向來虛冒兵糧。私扣朋馬。夤緣拔補。挪借軍裝等弊。猶未盡除。而教訓演習。惟事粉飾。因循怠忽。尚沿舊習。殊非設兵衛民之意。是必立定年限。專差大臣閱看。庶將弁知有責成。不敢怠廢。而各兵亦知有考驗。時時儆惕。技藝不致生疏。於戎行自有裨益。朕前旨。與以三年之限。著兵部請旨。並未定有分省查閱之年分。今已閱之省。則已過二年。其餘則未命前往也。其如何分年分省。差大臣往閱。著該部定議具

奏。俟臨時酌量。或自京命大臣前往。或即命本省督撫查閱。欽此。遵。

旨議定。自乾隆十二年為始。閱直隸。山西。陝西。甘肅。四川。五省。十三年閱湖北。湖南。雲南。貴州。四省。十四年閱福建。浙江。廣東。廣西。四省。十五年閱山東。河南。江南。江西。四省。以上分年查閱。周而復始。但每年應閱之處。定以四五省。其閒地方遙遠。營汛遼闊。若止。

欽差大臣一人。勢難周徧。至甘肅一省。地處極邊。安西提標駐防塞外。若令查閱川陝之大臣並閱。

則幅員廣遠難周。請於應閱直隸等省之年。直隸。山西差往一人。陝西。四川。一人。甘肅。一人。應閱。湖北等省之年。湖北。湖南差往一人。雲南。貴州。一人。應閱。福建等省之年。福建。浙江差往一人。廣東。廣西。一人。應閱。山東等省之年。山東。河南差往一人。江南。江西。一人。由部於每年開印後。將應閱之省具奏請

旨。並將領侍衛內大臣。滿洲大學士。都統。尚書。侍郎。各職名開列進呈。或

欽點大臣前往。或即令該省督撫就近查閱。恭候

欽定。再向來各省督撫提鎮。原有分年查閱營伍之例。嗣後各該省如遇

欽差大臣查閱之年。該省督撫提鎮。停其查閱。各省將軍督撫提鎮。務期加意整飭。毋事虛文。陸路不徒以甲冑鮮明飾觀。水師不徒以演就陣圖塞責。兵糧朋馬。毋許虛冒。浮開挪移掩飾。至軍政薦舉。尤關鉅典。更當慎重遴選。務令出於公允。俾人知自奮。以收干城之用。如有因循舊習一經

欽差大臣指叅。照例嚴加議處。○又議准營伍技藝

生疏器械缺少。經督撫提鎮將該管官以廢弛營伍題叅者。於題叅本內。將該將備何年月日到任。及該處營伍向來情形。據實聲明。如任事已滿一年者。仍照例革職。若在半年以上者。革職留任。三月以上者。降四級留任。三月以下者。暫免議處。令其加意整頓。以觀後效。○十二年

諭。國家承平日久。各省武備。恐致廢弛。屢經降旨訓飭。未見實力整頓。是以上年特令兵部議定分年分省。請旨差大臣前往查閱。嗣經該部分別議定。近聞各省。知有查閱之舉。無一事不加緊豫備。即如操演兵

丁。應於常時按期練習。使各兵技藝嫻熟。今則責效於倉猝。略無休息。不但非愛養士卒之道。於此愈見其平日之廢弛矣。又如旗幟甲仗號衣等類。以分隊伍。以壯軍威。原係營制所必需。向來動支公項製辦。自當按數貯營。以備操演之用。今則於查閱之時。始行修整豫備。甚至兵丁衣服等項。亦必欲一色鮮明。令其勉力措置。此皆徒務外觀。不求實際。比比皆然。是營將不以本務為事。惟留心於末節。其有項可支者。既致虛糜無項可動者。勢必有坐扣滋擾等弊。在將弁不知大體。止圖掩飾於目前。而該管大員又以

為如此豫備。可以了此番之看驗。而不顧貽累兵丁於日後。豈朕振勵戎行體恤士卒之本意乎。且定議欽差大臣查閱。亦以驗其技勇之生熟。兵數之虛實。糧馬之盈虧。以覘該督撫提鎮平時訓練整飭之實政。非止於旗幟甲仗衣服之間。取其美觀而已也。況輪年應閱省分。或由京差大臣前往。或令該省督撫查閱。抑或不必查閱。總在臨期裁奪。各該管督撫提鎮當善體朕意。統率屬員。從容整飭。為之以漸。而要之以久。不當若此急遽粉飾。務末而忘其本。是不但無益於營伍。且有累於兵丁也。著通行曉諭各省督

撫提鎮等仰體朕心。恪遵朕訓。將向來積弊。悉加祛除。則訓練有實效。考驗非具文。戎政可望煥然改觀矣。○十六年奉

旨。直省營伍操演武藝。不過拘泥成法。於安營住宿之道。馳騁奔走之勞。無從肄習。於行陣未有實濟。惟行圍可使將弁士卒練習勤勞。著通行直省提鎮。每歲冬季輪選標兵。親身督率。實力舉行。務使嫻熟嚴整。以裨實用。但既令出圍。仍復按期操演兵丁。未免過勞。著於行圍之時。酌量停止操演日期。以示體恤。並嚴加約束。不得蹂踐田園。占宿廬舍。致滋騷擾。○二

十五年奉

旨。直隸各省俱有補放綠旗滿洲官員。難保無有廢弛營伍。不能勤練兵丁。並身廢騎射。惟圖安逸。該管大臣姑容瞻徇。不行參奏者。著交該省總督提督毋得絲毫瞻徇。即行據實參奏。著通行曉諭外省綠旗滿洲官員。到任後務須操練兵丁。整飭營伍。學習騎射。以為兵丁表率。○又奏准。腹內省分。每兵一千名。設立鳥槍三百杆。沿邊沿海省分。每兵一千名。設立鳥槍四百杆。該管官弁精專操練。提鎮時加考驗。如不精練嫻熟者。指名題參。照廢弛營伍

例議處○二十七年

諭旗員補放綠營員缺。特因滿洲人員騎射素優。可作綠營官兵表率。並非欲令伊等在外安逸。徒占綠營之缺也。伊等自應加意勤習騎射。可以為法。綠營何至偷安怠惰。騎射生疏。在該管大臣等。理應不時查驗。一遇此等人員。立時叅奏。何至拘泥成例。直待將行軍政時。始行叅奏耶。著通行曉諭各省督撫提鎮。務將所屬武職。不時留心查閱。令其勤加練習。嗣後儻仍有不能騎射之人。不惟該員等罪無可逭。必將該督撫提鎮等一併治罪。○二十八年

諭前經降旨遇各省應行查閱營伍之年。由兵部奏請。或特派大臣。或即著該督撫就近巡閱。所以並及巡撫者。原指山東山西河南三省巡撫兼提督者而言。若其餘有總督省分。巡撫所轄僅撫標數營。此外通省武弁。皆非其正屬。巡撫本不得操其舉劾也。著通諭各督撫。嗣後除山東等省仍聽巡撫查閱外。其現有總督之省。著總督辦理。總督不能與巡撫同駐一城。如廣西等省相離寫遠。一時難以徧歷者。亦著隨時酌量會商具奏請旨。不得仍前徑行。徒滋紛擾。○

三十一年。覆准衛所守備千總。有經手錢糧。並

催兌催開。及修造船隻等事。與標員專習騎射者不同。若責令一體操演。必致有妨漕務。其與營員按月操演之處。應行停止。仍於不出運之時。照舊例。令就近督撫。每年調考一次。○三十四年

諭。各省營務。從前特派大臣巡閱。後因欽差外出。徒令各省酬應紛繁。於簡覈實無實濟。遇兵部奏請時。即令該督撫就近查閱。以督撫等係本省統轄大臣。重其責成。自當悉心訓練。乃伊等因無人糾摘。遂爾視為具文。不實心振刷。以致營伍日弛。皆歷任督撫玩

惴所致。國家設立營制。繕備平時。原以養有勇知方之士。若終年糜餉。徒蓄庸懦無用之人。豈復兵防本意。著飭諭各直省督撫。嗣後務同提鎮等。督率將備。加意策勵。訓練精嚴。遇當查察時。實力澄汰。糾叅毋以虛文塞責。庶為不負任使。○三十五年。覆准廣東通省營伍。分為東西兩路。將南澳潮州碣石等鎮。作為東路。右翼高廉雷瓊等鎮。作為西路。左翼鎮及不隸鎮屬各營。就近分別東西。令該提督分年巡查。如遇總督查閱之年。提督停其查閱。提督查閱之年。總兵停其巡查。至各省提督

於所屬營伍除地方不甚遼闊。可以一二年巡查一次者。仍照舊辦理外。至地方遼闊者。俱於三年內輪巡一次。其僅於新任後巡查一次。及委員查閱之處。概行停止。即令各省一體遵行。

○又

諭近年各省營伍廢弛。積習罔知悛改。此皆督撫提鎮等並不加意簡練。年來各省營伍皆派本省總督及兼管提督之巡撫查閱。伊等因係本屬之兵。未免心存姑息。不能實力振作。似此日就因循。營政豈可復問。殊不思簡派在京大臣。原係定制所當然。特因一

時不得可派之人。是以多令各省就近查辦。初非專委督撫等。遂聽虛應故事。不復留心體察。嗣後務期力改前非。實心振刷。使綠營痛懲惡習。士氣改觀。庶國家得收養兵詰戎之實濟。儻復仍前玩縱。並不諄切教誡。督率員弁及時操演。一任兵丁等糜餉誤公。將來朕或派公忠大臣前往查閱。伊等豈能豫行揣度。而所派大臣又豈敢稍為袒徇。一經查出叅劾。朕必將該督等重治其罪。以挽頽風。將此通行傳諭。俾知亟圖省惕。毋謂不教而誅也。○三十六年

諭。兵丁操演鳥槍。每兵定例歲給鉛四十兩。作為鉛丸。

令其演習打準。於中准其銷三分而檢回七分。今以檢七之數扣而不發。似此操演。安得有益。兵丁演放鳥槍於木靶。後設有攔牆。常時試驗準頭。自有定式。即不能中靶。不當踰於攔牆之外。尋檢鉛子。本自無難。不致多有折耗。若放槍不顧準頭。左右高下。惟意所適。鉛子皆拋棄無存。此乃益見習藝不精之故。嗣後鳥槍兵丁。照定例鉛數實給。令其施演有準。所檢餘鉛。按數備用。則藝事既可勵以精勤。即檢鉛亦令習於勞動。實為一舉兩得。○三十一年

諭。向來各營伍巡閱整飭。乃總督專責。滇省營制既較

他處為繁。且綠營積習委靡。尤須勤加訓練。但近年
來總督承辦邊務。不能常駐省城。提督總兵亦均有
差務公出。其各營弁兵等因無大員閱視。操演馴致
廢弛。甚有關係。嗣後如該督駐紮永昌。及提督總兵
駐防關隘。所有各標協營官兵。即著巡撫於上下半
年。隨便代為巡查考覈。從嚴甄別。如有應行叅劾者。
即咨明該督會同具奏。其省城督標及城守營吏為
切近。亦即代為董率訓練。庶於營務有裨。○三十九
年

諭。旗員簡用外任。原因綠營弓馬平常。令其表率俾有

所觀法。咸成勁旅。方謂無忝委任。若徒虛糜廩俸。貪逸養安。尚何足為綠營標準乎。嗣後各省綠營旗員。如有弓馬生疏。廢弛營伍者。著解任回京。該部帶領引見。再降諭旨。不得復為姑容。○又覆准綠營兵丁。原有操演鳥槍之事。而連環鳥槍。惟京城八旗獨擅其長。嗣後各省綠營。俱照健銳火器二營連環鳥槍法式一體演習。至各省營分大小不同。兵丁亦多寡不等。或係獨營專操。或應數營會操。應交各省督撫酌量情形。責成將弁勒限操演。務使一律精熟。仍令提鎮大員隨時考驗。

如過期不能嫻熟者。該督撫查明叅奏。將該營員弁照例議處。該提鎮照不實力稽查例議處。
○四十年覆准。各省輪應巡查之年。經

欽派督撫大臣等查出提鎮本標所轄將備內。有以營伍廢弛叅處者。即將該提鎮照例降二級留任。如係總督巡撫本標所轄者。將督撫降一級留任。至提鎮本標所轄將備。如有年力衰頹弓馬不堪之員。該提鎮即宜隨時叅處。其不豫行題叅。經督撫查閱之時。叅劾者。將該提鎮均照徇庇例降三級調用。○又奉

旨。各省提鎮所轄將備。如果年力衰憊。弓馬不堪。並不豫行叅劾。原應酌予處分。但各標營員甚多。督撫於巡察營務時。必不能不察出一二員以塞責。若因此一二將備。即將提鎮實降。則應降調者。歲不知凡幾。人材難得。亦屬可惜。且恐督撫等因立法過嚴。慮提鎮之輕罹叅處。即實遇衰頹庸劣之員。亦竟姑容不劾。日久流弊。轉致營伍廢弛。甚有關係。著交部另行酌議。不必定以實降處分。欽此遵。

旨議定。嗣後督撫查閱營伍時。遇有將備等弓馬不堪。年力衰邁。經督撫叅劾者。將不豫行揭叅之該。

提鎮降二級留任。○四十三年覆准鳥槍一項。於軍器中最為銳利。其操演之法。向以金鼓為號令。初擊鑼則裝藥。再擊鑼則端槍。鼓聲響始行開放。第演放一槍。而金鼓疊奏。既令其注視在靶。又使其待聽於金鼓。是耳目先已紛雜。神志安能專一。嗣後撤去鑼鼓。仿照京城大器營操練法則演放。以臻準速。○又覆准嗣後鳥槍兵丁打靶準頭及進步連環。責成總兵於每年巡查之時。每兵十名。打靶三十槍全著。並進步連環精熟者為頭等。備弁分別記功。兵丁重加

獎賞。著靶在二十五槍以上。並鳥槍連環平順者為二等。千把記功。兵丁量加獎賞。其著靶在二十槍以上。及連環合式者為三等。毋庸給賞。其著靶不及二十槍。及連環鳥槍生疏者。分別議處。將管操千把。照不操演軍士律。降二級留任。該營將備酌減降一級留任。兵丁責革。總兵巡查事竣。將著靶分數賞罰等第。造冊送部查覈。至提督本標鳥槍兵丁打靶分數。亦照此例辦理。儻提鎮不認真查辦。將打靶分數以少報多。以生為熟。已經查出不據實叅奏。將該提鎮

照捏飾具報例降一級留任。○四十四年奉

旨。校覈烏槍兵丁中靶不及分數之案。若由總督提督查叅者。該管總兵自應照例議處。此案係自行校閱。據實具奏。並自請交部。其誠實尚屬可嘉。並無可罪之處。烏大經著毋庸議處。嗣後有自行查奏者。俱著照此案辦理。○又覆准。嗣後綠營操演弓箭。每兵以五箭為率。能中靶三枝以上者為一等。量予獎賞。中靶二枝者為合式。其該管將弁統計所屬每兵十名。中靶合式七名以上者記功。六名者毋庸記功。過僅止五名而內有二三名列為

一等者。亦准其功過相抵。如合式止能及半。並無堪列一等。暨不及五名者。將該管官弁照操演鳥槍不及分數之例議處。兵丁嚴加責懲。又覆准前定打靶處分。原為整頓營伍起見。但立法過嚴。轉恐營員不能奉行。致啟隱諱欺飾之漸。嗣後綠營兵丁操演鳥槍。每兵十名。打靶三十槍。中二十槍以上者。列為一等。官弁記功。兵丁獎賞。中靶十五槍以上者。列為二等。中靶十槍以上者。列為三等。毋庸記功。過其不及十槍者。將該管官弁職名送部。仍照前議分別。

議處兵丁嚴加責懲。勒限一年練習。限滿仍不改觀。即行責革。儻恃打靶之分數過寬。不復實心訓練。各該督撫一經察出。即行據實叅奏。該營員照廢弛營伍例革職。四十八年奏准。巡捕新改五營。添設鳥槍。照健銳營操演連環陣式。又議准。黔省添設屯軍。責成古州等鎮協營武職官員。於農隙時就近點驗一次。其督撫提督每年巡邊閱兵之時。即行就近調集試操。如有年力衰憊。技藝生疏者。分別更換責懲。該管官弁並予叅處。再器械旗幟尤關緊要。該督

撫於每年巡邊閱兵之便。務宜隨時驗看。如有朽壞。嚴加懲勸。令其修補。○五十年議准。各省操演之法。向來綠營陣勢。止係兩儀四象方圓等式。相沿舊樣。無裨實用。嗣後仿照京城健銳火器等營陣式。交提臣轉發標營各鎮屬。如式演習。其鳥槍連環。應令多帶火藥。演放毋庸拘定出數。並嚴飭各營教演純熟。務得準頭。不得過於高仰。以期槍不虛發。仍令每日各照所習之技。在各本營分操。逢五逢十之期。各營合在一處比試。並操演九進十連環之陣。如有技藝

生疏者。即行裁汰。另挑補額。仍將各營將弁。豫為派定。不派別差。以便專意訓練。此外看守堆撥及應差兵丁。於差竣下班之日。仍令歸伍演習。○又

諭鳥槍為軍行利器。於整飭戎行。勦捕盜賊。兩有裨益。著傳諭各省督撫。將各該標藤牌兵丁。令其兼習鳥槍。一律嫻熟。○五十一年

諭國家設兵衛民。雖可百年不用。不可一日不備。全在平時訓練演習。紀律嚴明。方能有勇知方。臨陣克敵。但因承平日久。不能留心整飭。恐各省之廢弛怠玩。

者正復不少。嗣後各省總督及兼提督銜之山東河南山西江西各巡撫。當以營政為要。而提鎮尤應朝夕簡練。俾各兵馬步槍箭俱臻純熟。進退有節。庶平日可以資捍衛。而臨事足以供調遣。如再有廢弛者。一經查出。必將該營鎮將等加倍治罪。○又

諭前因臺灣孤懸海外。遠隔重洋。民情刁悍。姦徒易於滋事。向來親派御史前往巡視。職分較小。且不能備悉該處情形。實屬有名無實。是以降旨將請派巡臺御史之例停止。令該督撫及水師陸路兩提督。每年輪值一人前渡臺灣。嚴行稽察。如地方文武有骫法

營私擾累兵民之事。即可就近查明據實叅奏。今思福州將軍亦係該省大員。自應一體輪派。嗣後著該省將軍與督撫提督。分年輪值一人前渡臺灣。實力稽查整頓。以期永靖海疆。儻有仍前翫法貪黷等情。即行據實叅辦。至海洋風信靡常。前已降旨令該督撫等。止須俟風信平穩時配渡前往。不必拘定時日。但遠渡重洋。究係涉險。如該將軍督撫提督內有年逾七十者。著免其前往。以示體恤。○五十三年

諭額設兵丁。原以備差操防守之用。乃臺灣鎮將各署內。竟設有旗牌伴當。內丁管班四項名目。總兵署內

至有三百餘人之多。以致各該兵丁分班輪值。其餘俱在外自謀生理。甚至有挂名在內。貼錢包差。代班差操等弊。實屬不成事體。不可不嚴加禁革。恐別省提鎮將弁各署亦有似此者。著各省督撫即行詳悉嚴查。如有仍前設立名目。任意役使兵丁。至如許之多者。即將該提鎮將弁嚴叅治罪。務令額兵一體照常操演。毋許藉端曠伍。致滋他弊。第恐日久因循。不能認真整飭。嗣後該將軍等。每年輪往查察。務宜實力整頓。秉公辦理。○又

諭臺灣鎮道各員。令將軍督撫提督大員。於每年輪往

查察將鎮道府廳備弁佐雜各員通行查覈具奏。倘有貪縱殃民款蹟別經發覺將未經叅劾之員從重治罪。